

Sulisunik avataaneersunik atorfinitsitsiniarnernut qinnuteqaatit kommunenit suliarineqartillugit, qinnuteqaatit kommuneni suliffissaqartitsiniarnernut ataatsi-miititaliani tusarniaassutigineqartalernissaat qulakkeerniarlugu UKA 2012-imi Naalakkersuisut maleruagassioqqullugit Inatsisartut aalajangiiffigisassaattut siunnersuut. Ataatsimiititaliat qanoq katitigaassanersut aammalu sulinerat pillugu Naalakkersuisut aamma maleruagassalioqquneqarput.

(Inuit Ataqatigiit Inatsisartuni ilaasortaataat)

Akissuteqaat

(Inuussutissarsiornermut, Aatsitassanut Ikummatissanullu Naalakkersuisoq)

Aappassaaneerera

Siunnersuutip siullermeemeerlugu suliarineqarnerata nalaani nassuiaammik suliaqarnissaq soqutigisalinnullu attuumassuteqartunut taassuma tusarniaassutiginnissaa Naalakkersuisut neriorsuutigaa.

Oqaluserinneqqinnissamut Inatsisartunut ilaasortat tamanut tunnganerusumik aallaaveqarnissaat nassuiaatip siunertarivaa.

Maanni inatsisaasut nassuiaatiginerat tusarniaanermilu akissutigineqartut nassuiaatiginerat nassuiaatip imarivai.

Suliassaqarfimmi inatsisinik misissuinerup takutippaa, *Kommunit aqunneqarnerat pillugu inatsimmi* § 26 naapertorlugu, kommunit ataatsimiititaliamik ataavartumik, sulisussanik avataaneersunik atorfinitsitsinissamut akuersissutit pillugit sulianik suliarinninnermut atatillugu tusarniaaffigineqartussanik pilersitsisinnaaersut.

Aammattaaq *Kommunit aqunneqarnerat pillugu* Inatsisartut inatsisaat nr. 22, 18. november 2010-meersumi § 31, imm. 3 aamma 4 naapertorlugit, kummubestyrelsit ataatsimiititalianik immikkut ittunik avataanit ilaasortaartunik, sulisussanik avataaneersunik atorfinitsinissamik atuinissamilluunniit akuerineqarnissamut qinnuteqaatit suliarineqarneranni ataatsimititalianut ataavartunut, aningaasaqarnermut ataatsimiititaliamut kommunalbestyrelsimullu tapertaasinnaasunik pilersitsisinnaapput.

Kommunit sisamaasut tamarmiullutik maanna ataatsimiititalianik sulisussat avataaneersut pillugit sulianik suliarinnittartunik pilersitsisimareerput.

Naalakkersuisut nassuiaat naalakkersuisoqarfinnut attuumassuteqartunut, kommuninut, KANUKOKA-mut. SIK-mut NUSUKA-mullu tusarniaassutigaa.

Tusarniaanermi akissutinik Kommuneqarfik Sermersuumit, Kommune Kujallermit SIK-millu tigusaqartoqarpoq.

Kommunit isumaqatigiillutik siunnersuut itigartippaat, maanna ataatsimiititaliat aaqqissugaanerat atorlugu suliaqarfimmik imminut illersorneqarsinnaalluartumik ingerlatsisoqarneqarnera innersuussutigalugu. Siunnersuut akuerissutigineqassappat allaffissornerup annertuseriaannarneranik kinguneqassaaq. Aammattaaq Namminersorlutik Oqartussat immikkut ittunik inatsisiliornermikkut kommunit iluminni naalackersuinikkut aaqqissugaanerannut akuliunniarnerat Kommuneqarfik Sermersuup sakkortuumik assuaraa.

SIK siunnersuummik tapersersuivoq, ataatsimiititalianik immikkut ittunik Kommuni sinniisuanik, SIK-p immikkoortoqarfiata sinniisuanik, Sulisitsisut Peqatigiiffiata sinniisuanik, KNAPK-p immikkoortoqarfiata sinniisuanik taamaattoqassappallu Royal Greenland-p sinniisuanik inuttalersugaasumik pilersitsisoqarnissaa kattuffiup kissaatigiuarsimammagu. Ataatsimiititaliaq taakkuninnga ilaasortalerneqassappat, sulisinnaasut nunaqavissut suliffissaminnik neqeroorfigineqarnissaasa qulakkeerneqarnissaat SIK-p qularutiginnilaa.

Soolu Inuussutissarsiornermi Ataatsimiititaliap isumaliutissiissutaani kiisalu Naalackersuisut nalunaarutaanni takuneqarsinnaasoq kommuneni suliffissaqartitsiniarnermut atatsimiititalianik immikkut ittunik, sulisussat nunanit allaneersut pillugit suliasanik suliaqartussanik, pilersitsinissamut isumaqataasut akerliusullu ikigisassanngitsunik oqaaseqaateqarput.

Naalackersuisut qujamasuutigaat ataatsimiititalimi sukumiiusumik suliarineqarsimanera, ataatsimiititaliamilu isumaqatigiffiusumik itigartitsissutigineqarnissaanik innersuussut ilalersorneqarpoq taamaammallu siunnersuutip itigartitsissutigineqarnissaa innersuussutigalugu.